

10. marts 2026

UPA 2026/150

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

Nuummi Imarsiornermik Ilinniarfimmuut ininik attartuinnarani, Namminersorlutik Oqartussat tassunga illussamik sanatitsigunik, piginnittuugunillu siunissamut ungasinnerusumut naleqqunnerussanersoq pillugu nassuiaasiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Attartuinnarnermut nallersuullugu piginnittuunermi aningaasatigut, allaffissornikkullu kingunissaanik nassuiaat misissueqqissaarnertaqassaaq.

(Inatsisartunut ilaasortaq Bo Martinsen, Demokraatit)

Tunngavilersuut

Aalisarnermut, piniarnermut, imarsiornermut, imarsiornermillu inuussutissarsiuteqarnermi allanut sulisussanik ilinniartitsinerimi Imarsiornermik Ilinniarfik qitiusumik inissisimavoq. Inuussutissarsiutit taakkua nunatta aningaasaqarneranut, ineriartorneranullu aalajangiisuulluinnarput. Aalisarnek qitiulluinnartumik, inuunitsinnilu pisariaqartumik sulisertitaqarfiuvoq. Tamanna pillugu ilinniartitsinerimik, suliffimmik misiliinerimik, siunissamilu ilinniarfiit ineriartortinneqarnissaannut tunngavissiisunik imarsiornermik ilinniarfiit allannguqaatsunik, ullutsinnullu naleqquttunik atugassaqaqtitsinissaat pingaaruteqarpoq.

Imarsiornermik Ilinniarfik ullumikkut Nuummi qullersaqarfeqarpoq, ilinniarfillu illumi attartukkamiilluni. Taassumap saniatigut pikkorissartitsineritut ininik namminersorlutik attartortitsisartunut attartortoqartarpoq. Ataatsimut isigalugu imaappoq, Namminersorlutik Oqartussat ukiut tamaasa attartornermut annertuumik aningaasartuuteqartartut¹.

Attartorneq pisut ilaanni eqaatsumik aaqqiissutaasinnaasarpoq. Kisianni aamma inuiaqatigiinnut ataavartumik nalilinnik ineriartortitsisoqarani, piffissap ingerlanerani pisortat aningaasaatannik atuinerimik kinguneqartarpoq. Tamanna pillugu ilinniartitsinerimut Namminersorlutik Oqartussat namminneerlutik illuuteqarunik siunissamut ungasinnerusumut naleqqunnerussannginnersoq misissussallugu naleqquppoq.

Sammissaq pillugu apeqqummut² Naalakkersuisut akissuteqarnerminni ilaatigut paasissutissiisutigaat, massakkut illumi attartorneq piffissaligaasoq, ilutigisaanillu inissatigut unammillernartoqartoq. Taassuma saniatigut Naalakkersuisut nalunaarutigaat, illumik piginnittuuneq siunissamut ungasinnerusumut naleqqunnerpaatut aaqqiissutissatut nalilerneqartoq. Ilutigisaanik allassimavoq, piginnittuuneq

¹ § 37 naapertorlugu apeqqummut normu 20-2026-mut akissut

² § 37 naapertorlugu apeqqummut normu 20-2026-mut akissut



aningaasatigut aamma allaffissornikkut kingunissaanik sulii naatsorsuisoqarsimanngitsoq imaluunniit misissueqqissaartoqarsimanngitsoq.

Naalakkersuisut akissutaanni aamma allassimavoq, imarsiornermik ilinniarfiit siunnerfigalugit illu nutaaq ilinniarfissanik nutaanik ineriartortitsinissamut tunngavissiisinnaassasoq, ilinniarfinnik pioreersunik nukittorsaasinnaassasoq, immaqalu imarsiornermi ingerlatat amerlanerusut illumi ataatsimi ataatsimoortinneqarsinnaassasut. Taamaakkaluartorli taamatut aaqqiissuteqarnerup ilutigisaanik sanaartornermi annertuumik aningaasartuuteqarnermik kinguneqassasoq, soorluttaaq malitsigisaanik ingerlatsinermut, allaffissornermullu ullumikkut tamakkiisumik qulaajarneqarsimanngitsumik aningaasartuutitaqassasoq.

Paasissutissat taakkua tunuliaqutaralugit Demokraatit isumaqarput, apeqqut ataatsimut misissoqqissaagassaqissoq. Nassuiaatip ilaatigut tulluuttut qulaajartariaqarpai:

- Illumik nutaamik sanaartortitsinermut aamma piginnittuunermut nallersuullugu attartuinnarnermi aningaasatigut tamarmiusumik kingunissai
- Imarsiornermik ilinniarfiit siunnerfigalugit illumik sanaartornissami aningaasartuutissat
- Siunissami ungasinnerusumi ingerlatsinermi, aserfallatsaaliuinnermilu aningaasartuutissat
- Imarsiornermik ilinniarfiit ataatsimoortinneqarnerisigut, immaqalu annertunerisigut allaffissornikkut kingunissai

Illumik nutaamik sanaartortoqassanersoq siumut aalajangiinissaq siunertaanngilaq. Inuiaqatigiinnut, minnerunngitsumillu Imarsiornermik ilinniarfimmu siunissamut ungasinnerusumut aaqqiissutissaq suna naleqqunnerpaassanersoq nalilernissaani, Inatsisartut aalajangiinissaminni tunngavissaqarluarnissaat qulakkiissallugu siunertaavoq.

Demokraatit isumaqarput, ilinniarfinnut aningaasaliinerit ataatsimoorussamik siunissatsinnut aningaasaliinerusut. Tamanna pillugu pingaarnertut inuussutissarsiuutitta sulisunik pisariaqartitaannik ilinniartitsillutik ilinniarfinnut, sapinngisamik sinaakkutinik pitsaanerpaanik aamma qulakkeerinissarput pingaaruteqarpoq.

Neriuppugut siunnersuut Naalakkersuisunit, maanilu Inatsisartuni partiinit tapersersorneqassasoq.

Pisortanut aningaasatigut allaffissornikkullu kingunerisassai

Nassuiaasiornermut atatillugu aningaasartuuteqassaaq. Taakkua ilinniagartuut ukiumut 500.000 koruunit nalinginut sulinerat qaangissanngikkaat naatsorsuutigineqarpoq.



Namminersortunut aningaasatigut allaffissornikkullu kingunerisassai

Nassuiaammut atatillugu soqanngilaq.

Innuttaasunut aningaasatigut allaffissornikkullu kingunerisassai

Nassuiaammut atatillugu soqanngilaq.